

Sumáriu Kazu
Tribunál Judisiál Primeira Instáncia Baukau
Agostu 2025

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Judisiál Primeira Instáncia Baukau

1. Totál kazu ne'ebé JSMP monitoriza: 5

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b), 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilícitu sira kona-ba violénsia doméstika	2
Artigu 145 Kódigu Penál (KP)	Ofensa ba integridade física simples	1
artigu 171 KP	Koasaun seksuál	1
Artigu 138 KP no Artigu 2(nú.1(b), nú. 2(f)), artigu 20(nú.1)	Omisídiu simples no arma brankas	1
Totál		5

1. Totál desizaun ne'ebé JSMP monitoriza: 3

Tipu desizaun	Artigu	Númeru
Pena prizaun	Artigu 66	1
Suspensaun ba prizaun nia ezekusaun	Artigu 68 KP	2
Totál		3

2. Totál kazu ne'ebé sei kontinua prosesu tuir JSMP nia monitorizasaun: 2

B. Deskrisaun sumáriu julgamentu ba desizaun kazu sira

1. Krime omisídiu simples no arma brankas

Nu. Prosesu : 0541/24. PCCIC
Kompozisaun Tribunál : Singulár

Juisa	: Dra. Maria Solana da C. Fernandes, Dra. Sribuana da Costa no Dra. Maria Modesta d. A. Viera
Prokuradór	: Dr. Julio da Silva Correia
Defeza	: Dr. Grigorio M. L. de Lima
Desizaun	: Pena prizaun tinan 15

Iha 08 Agostu 2025, Tribunál Judisiál Primeira Instánsia Baukau, prezide leitura akordaun ba kazu omisídiu simples no arma brankas ne'ebé envolve arguidu Cristiano Trindade Lobato hasoru ofendidu Thomas da Silva no Eestadu RDTL, iha Suku Makadiki, Postu Uatulari, iha Munisípiu Vikeke.

Akuzasaun Prokuradór

Prokuradór akuza katak, iha 23 Janeiru 2024, iha oras tuku 16:30 lokraik, arguidu ho ofendidu diskute malu kona-ba loron 12 Novembru nune'e mosu dezintendementu no baku malu hafoin família sira mai haketak nune'e arguidu halai ba uma foti tudik fila mai hasoru ofendidu iha dalan hodi sona iha ofendidu nia sorin parte loos. Depoisde sona tiha ofendidu arguidu halai hosi fatin akontesementu no viziñu sira mak kontinua lori ofendidu ba sentru saúde bainhira to'o iha sentru saúde ofendida i'is kotu/mate ona.

Prokuradór akuza arguidu kontra artigo 138 KP kona-ba omisídiu simples ho moldura penál tinan 8 to'o tinan 20 konjuga ho artigo 2(nú.1(b), nú. 2(f)) no artigo 20(nú.1) ho moldura penál tinan 3 to'o tinan 6 hosi Lei Nú. 5/2017 kona-ba Arte Marsiais, Rituais, Armas Brankas, Rama Ambon hosi kinta alterasaun Kódigu Penál.

Produsaun ba prova sira

Iha prosesu julgamentu, arguidu deklara katak faktu iha akuzasaun ne'e loos hotu, arrepende nia hahalok, foin primeiravés mai hatan iha tribunál arguidu iha prizaun preventiva fulan ualu ona.

Tribunál bazeia ba pedidu hosi prokuradór, presinde testemuña sira nia depoimentu tanba prokuradór konsidera faktu suficiente ona bazeia ba konfisaun arguidu nian. Alende ne'e, parte defeza konkorda ho pedidu ne'e.

Alegasaun finál

Prokuradór haktuir katak haree ba produsaun ba prova arguidu nia aktu ne'e priense krime ne'ebé akuza ba arguidu, haree mós prova sira foto grafia no relatóriu médiu mós amostra katak arguidu utiliza tudik hodi sona iha ofendidu nia isin iha parte ne'ebé hakotu ofendidu nia vida, atu prevene iha futuru arguidu la repete tan aktu hanesan hasoru ema seluk ofendida, husu ba tribunál atu kondena arguidu ho pena prizaun tinan sanulu resin ualu.

Alende ne'e, defeza husu ba tribunál atu fó pena ne'ebé justu ba arguidu ho konsiderasaun katak, arguidu konfesa, arrepende ninia hahalok no foin primeiravés mai hatan iha tribunál

Desizaun

Depoisde avalia faktu hotu, tribunál konsidera faktu hotu iha akuzasaun

prokuradór nian provadu hotu no bazeia ba konfisaun arguidu nian iha audénsia julgamentu.

Bazeia ba faktu provadu sira ne'e hotu no tetu mós ho sirkunstánsia hotu-hotu ne'ebé mak haleu krime ne'e, nune'e tribunál konklui prosesu ne'e no kondena arguidu tinan sanulu resin hitu ba krime omisídiu simples no kondena arguidu tinan tolu ba krime arma brankas, tribunál halo komulasaun jurídku hodi kondena arguidu ho pena únika tinan sanulu resin lima.

2. Krime ofensa ba integridade fízika simples ho natureza VD

Nú. Prosesu : 0095/24.BCSIC
Kompozisaun Tribunál : Singulár
Juisa : Dra. Albertina da Conceição das Neves
Prokuradóra : Dra. Remizia de Fátima da Silva
Defeza : Dr. Albino de Jesus Pereira
Desizaun : Pena prizaun fulan 1 suspende ba tinan 1

Iha 08 Agostu 2025, Tribunál Judisiál Primeira Instánsia Baukau, prezide leitura sentensa ba krime ofensa ba integridade fízika simples ho natureza VD ne'ebé envolve arguidu AdC hasoru nia feen, iha Munisípiu Baukau.

Akuzasaun Prokuradór

Iha 16 Outubru 2024, iha oras tuku 5:30 madrugada, iha arguidu ho ofendida nia uma arguidu tuku dala-ida iha ofendida nia matan, parte karuk. Arguidu atu ba buka katana, ofendida sente ta'uk nune'e ofendida halai ba iha nakukun laran no nia oan ki'ik na'in-rua halai tuir, sira na'in-tolu ba toba iha banin feto nia uma.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak momentu ne'e mosu diskusaun kona-ba ofendida ba vizita nia inan aman iha Lospalos fila kleur, iha diskusaun ne'e arguidu buka nia katana atu ba kantareiru la'os atu baku ofendida, durante forma família nunka halo agresaun hasoru ofendida.

Alende ne'e, ofendida kontinua konfirma faktu sira iha akuzasaun no deklara katak kalan bainhira ofendida toba arguidu buka lia ho ofendida nune'e sira na'in rua diskute malu arguidu nervozu hodi tuku iha ofendida nia matan parte karuk.

Testemuña AdC nu'udar ofendida nia banin feto depoimenta katak ofendida ba testemuña nia uma, maibé la konta buat ruma ba testemuña.

Alegasaun finál

Prokuradór haktuir katak iha produsaun ba prova arguidu nega faktu sira ne'ebé prokurador imputa ba testemuña mós dehan ofendida ba nia uma maibé la konta buat ruma ba nia, iha audénsia julgamentu ofendida nafatin konfirma

faktu sira iha akuzasaun. Tanba ne'e husu ba tribunál atu kondena arguidu tuir hahalok ne'ebé nia halo ba ofendida hodi prevene aguidu nia aktu iha futuru.

Alende ne'e, defeza haktuir katak arguidu la baku ofendida, sira mosu diskusaun kona-ba ofendida ba nia inan aman nia uma Lospalos liu semana ida mak fila, iha ne'e ofendida halai ba testamuna nia uma. Tanba ne'e husu ba tribunal atu absolve arguidu hosi prosesu.

Desizaun

Depoisde avalia faktu sira hotu, ne'ebé produs durante julgamentu mezmu arguidu nega faktu sira maibé tribunál naftin konsidera faktu hotu iha akuzasaun bazeia ba ofendida nia konfirmasaun ba akuzasaun.

Bazeia ba faktu provadu sira ne'e no tetu mós ho sirkunstánsia sira hanesan foin primeiravés mai hatan iha tribunál, di'ak malu ona kontinua moris hamutuk nu'udar feen ho la'en nune'e tribunál konklui prosesu ne'e no kondena arguidu ho pena prizaun fulan ida suspende ba tinan ida.

3. Krime koasaun seksuál

Nú. Prosesu	: 0002/23.MNLLA
Kompozisaun Tribunál	: Koletivu
Juisa	: Dra. Albertina da Conceição das Neves, Dra. Maria Modesta d. A. Viera no Dra. Sribuana da Costa
Prokuradór	: Dr. Julio da Silva Correia
Defeza	: Dr. Sidonio Maria Sarmento
Desizaun	: Pena prizaun tinan 2 suspende ba tinan 2

Iha 08 Agostu 2025, Tribunál Judisiál Primeira Instánsia Baukau, prezide leitura akordaun ba krime koasaun seksuál ne'ebé envolve arguidu GVhasoru ofendida, iha Munisipiu Manatuto.

Akuzasaun Prokuradór

Prokuradór akuza katak, 09 Feveireiru 2023 iha oras tuku 09:00 Otl, ofendida hanesan traballadora kompañia ida ne'ebé serbisu hamutuk ho NGO Internasionál hosi Dili, atu fahe informasaun kona-ba moras COVID-19 no iha momentu ne'eba arguidu hanesan koordenador eskola nian, depoisde atividade fahe informasaun kona-ba COVID-19 ba estudante sira hotu, ofendida ba iha arguidu nia gabinete atu asina lista vizitantes nian no bainhira ofendida asina hotu atu hamrik, arguidu mós hamrik hodi kaer metin ofendida nia liman depois dada rabat ofendida ba arguidu nia isin hodi rei iha ofendida nia reen-toos, hakuak ofendida metin depois buti iha ofendida nia susun parte loos dala ida rezulta moras no halo ofendida moe.

Depoisde akontesimentu ofendida dudu sés arguidu hodi husu "tanba sa mak ita boot halo hanesan ne'e no arguidu husu deskulpa no hateten tan katak diabu mak tama iha nia arguidu nia laran". Ofendida halai hodi pasa informasaun ba Diretór Eskola nian, nune'e dieretór haruka ofendida apresenta kedas keixa ba iha polísia.

Prokuradór akuza arguidu kontra artigu 171 KP kona-ba koasaun seksuál ho moldura penál tinan 2 to'o tinan 8.

Produsaun ba prova sira

Iha prosesu julgamentu, arguidu konfesa integralmente ba faktu hotu ne'ebé mak hakerek iha akuzasaun prokuradór nian, arguidu deklara katak iha akontesimentu ne'e arguidu hakneak hodi husu deskulpa ba ofendida, arguidu mós deklara katak arrepende ninia hahalok no promete iha futuro sei larepete tan ninia hahalok ne'e no arguidu mós hetan ona sansaun disiplinar durante tinan ida.

Alende ne'e, ofendida kontinua konfirma faktu sira iha akuzasaun ofendida deklara katak iha akontesementu ne'e arguidu hakneak hodi husu deskulpa ba ofendida, ofendida perdua ona arguidu maibé husu atu labele halo tan hahalok ida ne'e ba ema seluk.

Alegasaun finál

Prokuradór haktuir katak durante produsaun ba prova arguidu konfesa ba faktu hotu ne'ebé mak hakerek iha akuzasaun, arguidu nia aktu ne'e prenze duni krime koasaun seksual nune'e husu ba tribunál atu kondena arguidu ho pena efetiva tinan ida.

Entretantu, defeza haktuir katak arguidu konfesa aktu hotu ne'ebé mak nia halo, arguidu mós husu deskulpa ona ba ofendida no arrepende ona nia hahalok, foin primeiravés mai hatan iha tribunál, arguidu mós hetan sansaun disiplinár durante tinan ida nune'e parte defeza husu ba tribunál aplika pena suspensaun ba arguidu.

Desizaun

Depoisde avalia faktu sira hotu, ne'ebé produs durante julgamentu tribunál konsidera faktu hotu iha akuzasaun prokuradór nian provadu hotu bazeia ba konfisaun arguidu nian no konfirmasaun ofendida nian.

Bazeia ba faktu provadu sira ne'e no tetu mós ho sirkunstánsia sira hanesan arguidu konfesa, arrepende liuhosi husu ona deskulpa ba ofendida no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Direasaun e-mail: ana@jsmp.tl
info@jsmp.tl
Website: <http://jsmp.tl>